

說郛

正七十三

僧12
6
72



412
6
72



說邪目錄

弓第七十三

祛疑說

儲泳

辨惑論

謝廷芳

善誘文

陳錄

樂善錄

李昌齡

東谷所見

李之彥



祛疑說



雲間儲泳

易占說



筮易以著古法也近世以錢擲爻欲其簡便要不能盡卜筮之道自昔以錢之有字者為陰無字者為陽故兩背為拆二畫也兩字為單一畫也朱文公以為錢之有字者為面無字者為背凡物面皆屬陽背皆屬陰反舊法而用之故建安諸學者悉主其說或謂古者鑄金為貝曰刀曰泉其陰或紀國號如鏡陰之

有款識也一以爲陰一以爲陽未知孰是大抵筮必以著求爲簡便必盡其法余嘗以木爲三彈丸各六面三面各刻三畫三面刻二畫呵而擲之以盡老少陰陽之變三丸各六面十有八變之義也三面爲三乾之九也三面爲二坤之六也此用九用六之義也三者乾之一畫函三也二者坤之一畫分二也此三天兩地之說也三丸擲之皆三則成九老陽數也三丸皆二則成六老陰數也兩二一三則成七少陽數也兩三一二則成八少陰數也所用者乾坤之畫

以成八卦是乾坤生六子之象也九象太極之一也三三爲乾二二爲坤象兩也三丸者象天地人之三才也每丸得數十五洛書皇極數也合三丸之數而爲四十有五河圖九宮數也上二則下三上三則下二動靜皆五故五藏於用參以四十五數太衍之數五十也三丸成九於上則三丸伏六於下此老陽變陰之體也三丸成六於上則三丸伏九於下此老陰變陽之體也二三相對每丸各具三五此三五以變錯綜其數之旨也體圓而轉變動不居也六位相乘

周流六虛也三九六擲而成卦亦十有八變之義也
既無錢背錢面陰陽之疑又合老少陰陽之變嘗於
舟中以與同志朱子美大以爲然因著其法與好事
者同其用

辨脉

醫者可以生人可以殺人所繫尤重故世子拜醫重
之至也切脉之際沉微弦緊之小差投藥之間表裏
汗下之小誤則不復有再生之理此世之所通患然
亦在所未暇論夫所謂脉者世皆知王叔和之脉訣

矣左心小腸肝膽腎右肺大腸脾胃命此五臟六腑
一定之位也醫者於一指之間以前半指爲心後半
指爲小腸他部皆然而或者以六腑乃五臟之應以
輕取重按之間爲五臟六腑之別切脉之法其說有
二彼是則此非彼非則此是部位未定况望其不繆
於證耶又有大可疑者婦人之脉惟以尺脉之常盛
常弱與男子爲相反而脉訣謂反此背看切疑其有
訛也夫男子婦人形體絕異陰陽殊途也故男生而
覆女生而仰男則左旋女則右轉凡陽氣則自下而

上陰氣則自上而下男主施與陰主翕受而男子之至命在腎而處五臟六腑之極下女人之命在乳而處五臟六腑之極上氣形皆異脉傳於氣形之間者也何乃男子之與女人略不少異耶况背看二字殆必有說旣言反此又言背看必不止於常弱常強之分而已也及觀褚澄尊生經而前之疑者始以自信世未始有以女人之脉背看如褚澄之說者尊生經曰脉分兩手手分三部隔寸尺者命之曰關去肘度尺曰尺關前一寸爲寸左手之寸極上右手之尺極

下男子順自下生上故極下之地右尺爲受命之根本如天地未分元氣混沌也旣受命矣萬物從土而出惟脾爲先故尺上之關爲脾脾主生金故關上之寸爲肺肺金生水故右手之寸越左手之尺爲腎腎水生木故左手尺上之關爲肝肝木生火故關上之寸爲心女子陰逆自上生下故極上之地左手之寸爲受命之根本旣受命矣萬物從土而出惟脾爲先故左手寸下之關爲脾脾土生金故關下之尺爲肺肺金生水故左手之尺越右手之寸爲腎腎水生木

故右手寸下之關爲肝肝木生火故關下之尺爲心
男子右手尺脉常弱初生微眇之氣也女子右手尺
脉常強心火之位也非男非女之身感以婦人則男
脉應診動以男子則女脉順指不察乎此難與言醫
褚澄尚主爲宋駙馬都尉察脉如神著書十篇曰尊
生秘經此其一也

辨鍼

陰陽家之說尚矣其間得失是否未易輕議要亦驗
諸事折諸理而已地理之學莫先於辨方二十四山

於焉取正以百二十位分金言之用丙午中針則差
西南者兩位有半用子午正針則差東南者兩位有
半吉凶禍福豈不大相遠哉此而不明他亦奚取曩
者先君卜地日者一以丙午中鍼爲是一以子午正
鍼爲是各自執其師傳之學世無先覺何所取正而
兩者之說亦各有理主丙午中鍼者曰狐首古書專
明此事所謂自子至丙東南司陽自午至壬西北司
陰壬子丙午天地之中繼之日針雖指南本實戀北
其說蓋有所本矣又曰十二支辰以子午爲正厥後

以六十四卦配爲二十四位丙實配午是午一位而丙共之丙午之中卽十二支單午之中也其說又有理矣主子午正針者曰自伏羲以八卦定八方離坎正南北之位丙丁輔離壬癸輔坎以八方析爲二十四位南方得丙午丁北方得壬子癸子午實居其中其說有理亦不容廢又曰日之躔度次丙位則爲丙時次午則爲午時今丙時前二定之位良亦勞止因著其說與好事者共之但用丙午中鍼亦多有驗適占本位耳

墨說

製墨之法取煙不過欲其輕遠而水之重輕膠之分兩隨時增減大槩不甚相遠世人往往入他藥以助其黑色發其光燄不知天下至黑何以加於油煙入藥一分減色一分耳惟當事治膠法煎膠之次恐其滯也有藥以醒之恐其烈也有藥以敗之故藥去而性存膠成而體不雜膠煙之外不用一藥此墨之所謂膠法也夫煙之所以黑者搗練之功也今之製墨者以手搜劑緩則燥裂一再蒸之已失其性况敢搗

練千杵耶得製膠之法又能緩膠之性則入鐵石曰中搗之一二千下膠性如飴惟意所適然後作錠出煙之黑色發煙之光燄未有過於此者區區秦皮紫草之類適爲膠法累耳雅意文房者不可不知此理行持是正心誠意之學

道家之行持卽吾儒格物之學也蓋行持以正心誠意爲主心不正則不足以感物意不誠則不足以通神神運於此物應於彼故雖萬里可驅攝於呼吸間非至神孰能與此嗚呼廣大無際者心也隔礙潛通者神也然心不存則不明神不養則不靈正以存之久而自明誠以養之極而自靈世之學者不務存養於平時而遽施行於一旦亦猶汲甘泉於枯井採萹華於槁木吾見其不可得矣及其氣索神驚取侮致敗乃歸怨神之不靈法之不驗良可悲也

符印呪訣不靈 祭將召邪

符印呪訣行持之文具也精神運用行持之玄妙也感應乃其枝葉煉養乃其根本不知其根本玄妙而徒倚符印呪訣爲事雖甚靈驗亦徒法耳蓋符印本

不能自靈依神通而感應苟得感通之道何假符印
呪訣哉彼時師不達深妙持將祭則靈之說以愚後
人遂使後學一意祭賽損物傷生召引無依求食之
鬼日至月增結成徒黨自謂驅攝指揮如意不知以
邪攻邪實有損於行持者之身也余自總角愛行持
傳授殆徧法書數箱印幾百顆意謂法止於此道心
堅猛天誘其衷忽遇至人授以口訣不出數旬遂縱
橫於諸法中方知將吏只在身中神明不離方寸符
印呪訣皆符合之具也世之志尚清高雅意道法者

不可不知此理

呪水自沸 移景法

正法出於自然故感應亦廣大邪法出於人爲故多
可喜之術余舊見呪水者不施藥物立使騰沸始甚
奇之及得其說乃以猪囊藏袖中用手法助之耳如
移景之法類多髣髴惟一法如烈日中影人無不見
視諸家移景之法特異及得其說乃隱像於鏡設燈
於旁燈鏡交輝傳影於紙此術近多施之攝召良可
笑也大抵行持正法不過正心誠意而物格本無心

於竒怪之應非如邪法之專於愚世駭俗聳動見聞也至於召雷而雷禱雨而雨此亦誠通物格之妙自然而已豈容以人僞參之哉

叱劔斬鬼

幼時嘗聞一道士有斬鬼之法每置劔空室中以水澀之叱其斬妖對衆封閉來日啓之流血滿地數年後旅寓中得親見此道士旣久聞名厚加禮遇而求其法始甚珍秘久之許傳乃出示一草實密以擦劔含水大噴經夕視之水皆血色一見釋然蓋人之與

鬼陰陽一氣耳一氣受形而爲人一氣離形而爲鬼血因形而生旣不受形何從有血天下未有無形而有血者君子可欺以方難罔以非其道惟達理者不受非道之欺

呪棗煙起 呪棗自焦

舊聞呪棗而煙起或呪而棗焦者心雖知其爲術不知其所以爲術也後因叩之道師乃知棗之煙者藏藥於棗託名以呪撚之則藥如煙起其棗之焦者藏鏡於頂感召陽精舉棗就鏡頃之自焦是知竒怪之

祛疑論
事非藥則術不足多也

燒香召雷神 錢入水卽化

向有行雷法者以夜游艾納數藥合而爲香每燒則煙聚爐上人身鳥翼恍如雷神所至敬向不知其爲藥術也師巫多挾術以欺世向見一女巫應有祈禱必納香錢使自投於淨盂中隨卽不見人多神之後得其術乃用葶薺水銀雜草藥數種埋之地中七七藥成每密投少許於水中錢入卽化挾邪術託鬼神以欺世如此類者甚多不欲盡紀姑叙數端以祛後

來者之惑

請封書仙

降筆之法甚多封書降筆者最異其封愈多而牢其拆愈易而疾惑而信者多矣不動全封可隨意而書寫或以天麻子油書之不見其跡此實唯拆書之術耳然有挾此資身者故不欲著其所以拆云

呼鶴自至

向遇一道友能呼鶴雀之類從而求之幾月乃許傳授其法用活雄鳩血書符殺命助靈心已不喜先授

七字呪約旦日教以作用閱其呪語盡從反犬有狐
狸等字方知此爲嶺南妖術耳遂不卒受其說彼察
知不悅亦就辭去戲已無益况左道乎好怪傷生尤
非仁人君子之事

呼鼠 祛蚊

白幼愛接道友有一人能呼鼠羣聚久之遣去亦能
祛蚊自謂以法追禁始亦疑之久相與處察其動靜
悉非呪法每欲呼鼠必先期收市狼糞黑犬皮之類
惟祛蚊之術不可知一夜醉寢取其篋中香末試燒
蚊悉遠去但不知其用藥然正作荷花香來日叩之
微笑不答想亦荷花之鬚耳

覆射

覆射之法甚多如覆命認錢之類無非暗號如左右
多少之類出於算法此不足道惟一法用七言詩兩
首括天下字凡有音者皆包羅而不遺兩詩各四十
九字分前後片前片四十九字內以三字分上去入
聲一字爲疊實四十五字耳此四十五字分喉齒唇
舌四音後四十九字總括諸韻合成反切故天下字

無不可知人但見其或擊鑼鼓或用片紙反認以錢
不知其以四十九字寄律於此也然可求者字之音
難窮者字之體必能通文理而後可學否則亦徒然
爾然立法簡妙不可得以智識推度因著此以廣好
事者之見

知術

欺世之術君子之未達者固多察之察而知其所以
爲邪足矣如知其邪而邪之非上善之用心也故余
特叙其術之大槩而不言其全正慮是也

邪正

人惟一覺性耳覺之一字可以斷疑情祛邪妄一雜
亂返真常人苟氣宇清明心神虛爽邪魅何從而入
惟其昏擾濁亂自生顛倒見解故外邪客氣乘之然
外邪客氣卽我之顛倒見解而已非外來也由內不
自正故曰外邪心無所主故曰客氣當知覺性易昏
惟誠以養之則明定以持之則清清明之極道乃可
成盡敬事神不若還以事其性天之神也

鬼神之理

世之論鬼神者有二持福善禍淫之說者泥於有持萬法惟心之說者著於無不究端倪皆非至當夫鬼神者本無形迹之可見聲臭之可求謂之有則不可至於寒暑之代謝日星之運行雷電風雨之倏變條化非鬼神之顯著者乎此謂之無則又不可蓋天地之間惟陰陽耳天地者陰陽之祖也神者天之陽精鬼者地之陰氣陰陽者天地之妙用鬼神者陰陽之變化自天統開於子輕清之炁一萬八千年升而爲天天之晶華凝結而爲日月星辰成象旣著功用乃

行地統開於丑重濁之炁一萬八千年凝而爲地地之靈氣融結而爲山川河嶽成形旣定盼蠻攸召天之一氣列而爲清明之神主造化運四時地之一氣鍾而爲福德之鬼鎮土字司五嶽如天一生水於北水之精化爲玄武位鎮朔方此天地自然之道豈驅而爲之哉鬼神者陰陽顯著之名耳二氣運行本無形迹之可見固不可謂之有召其機微之積錯揉之變則風霆流形妖祥示象此天地之鬼神也故聖人謂鬼神之德易謂鬼神之情狀又其可謂之無乎鬼

神者陰陽之粹精也依氣而聚散氣者形之始也氣聚則顯然成象氣散則泯然無跡本於無而出則有出則有而入於無古人謂鬼隱龍匿莫知其踪是也夫幽深寥閭淪寂無聲視之不見聽之不聞者推本則無也或見光景或聞音聲如在其上如在左右者氣感而有也惟人稟陽於天受陰於地生神於陽成形於陰鬼神造化皆備於我特其體有大小故鬼神之功用與天地有等殊耳知此理則知鬼神之情狀

陽神陰靈之說

有客舉倩女離魂話因及張紫陽與雪竇禪師入定事謂雪竇以禪定成至陰之爽故不能持物而還紫陽以金丹凝至陽之神故能持果而返此事之有無不必深辨大槩先輩以此別性宗與神形俱妙之功用不同耳因語客曰陽神能運物陰神不能運固也今山魃物精邪鬼而已飛瓦走石運致寶貨瞬息千里謂之陽神可乎客不能對後每以此問人莫得其說嗚呼知此說者其知性命之所以不同歟

天道不遠說

嘗觀劉向災異五行傳後世或以爲牽合天固未必以屑屑爲事然殃咎各以類至理不可誣若遽以牽合少之則箕子之五事庶證相爲影響顧亦可得而議乎試以一身言之五行者人身之五官也氣應五臟五氣調順則百骸俱理一氣不應一病生焉然人之受病必有所屬太陽爲水厥陰爲木是也而太陽之證爲項強爲腰疼爲發熱爲惡寒其患雜然而並出要其指歸則一出於太陽之證也猶貌不恭而爲常雨爲狂爲惡也况五官之中或貌言之間兩失其

正卽素問所謂陽明厥陰之合病也其爲病又豈一端之所能盡哉以一身而察之則五事庶證之應蓋可以類推矣劉向五行傳直指某事爲某證之應局於一端殆未察醫書兩證合病之理也後之人主五事多失其正受病蓋不止一證宜乎災異之互見迭出也局以一證論之未爲得也夫冬雷則草木華蟄蟲奮人多疾疫一炁使然景星慶雲不生聖賢則產祥瑞象見于上則應在於下如虹蜺妖氣也當大夏而見則不能損物百物未告成也秋見則百穀用耗

矣或入人家而能致火飲井則泉竭入醬則化水和氣致祥妖氣致異厥有明驗天道感物如響斯應人事感天其有不然者乎如風花出海而爲飄風山川出雲而爲時雨農家以霜降前一日見霜則知清明前一日霜止霜降後一日見霜則知清明後一日霜止五日十日而往前後同占欲出秧苗必待霜止每歲推驗若合符節天道果遠乎哉感於此則應於彼有此象則有此數乃不易之理也

神像所以靈

設土木像敬而事之顯應靈感此非土木之靈乃人心之靈耳夫壇場社廟或興或廢有靈有不靈者係人心之歸與不歸風水之聚與不聚蓋人者具真覺之靈受中和之氣天地之內莫靈於人人心所聚靈氣之所聚也彼得風水之利者氣脉停止人心精爽得以依之此所以愈靈而愈興也其失風水之宜者和氣不聚人心精爽無所依棲隨而蕩散此所以日廢而不靈也凡壇場立於風水會聚之地而人心歸鄉未有不靈而福德者愚人不知此理欲助其靈乃

取活蛇生鴉或縛獼猴藏於土木偶之胃腹此非助靈之道實助其妖孽耳知者不可以不戒

陰陽家多拘忌

太史公言陰陽家多拘忌信哉斯言將盡從之則彼可此否不勝其牽制將盡棄之則禍福顯驗有不可誣者然則何為而可余為之斷曰大而緊者避之小而緩者略之合於理者從之背於理者去之如太歲

一星出元經非歲建也九梁會煞之類此大而緊者所當避

忌如蠶室太陰狼籍流財之類此小而緩者可以略

去不必盡求合也如歲位吉凶九宮飛白六壬之四殺沒於四維六神制於六道遁甲之趨三避五逼迫刑格旨意玄微立法深妙皆萬世不可刊者所當遵用夫復何說如四衝所通忌活曜則取以為吉三方實死法五符謂百無所忌不通於理烏可準憑論陰陽者既知去取又當以胃中活法參之如金神惡殺也其權司秋其位居兌正秋作之復值巳酉丑地決不免禍如作於夏或值丙離權去勢衰未為深害即此而論則活法可類推矣故曰安得圓機之士語九

流乎此太史公之微旨也夫人生天地間應變酬酢未有不爲陰陽束縛者烏可不知所趨避哉惟君與相勢位力量可以幹造化贊陰陽鎮靖方隅制伏神煞下此所不當忽也至於窮理盡性之聖賢得道心空之高士離五_仁超物外天地不得違其機鬼神不得窺其迹豈陰陽所能籠絡哉如此者又不可以槩論

辨身壬法

陰陽家多拘忌達者固不當一切求合然吉凶影響

要不可廢如酒醋遇弦而生涎糟醬遇_水而作湧雞子日中則正日昃則偏鵲避歲君燕避_庚巳一炁運化萬物莫逃人亦天地之一物豈能獨立於陰陽之外哉自羲和之學失其世守而文字之傳或多剽切世罕精於此道如造作一法人所當用大要先論身壬之法則大不可曉夫所謂身壬者陰陽二命皆起於壬也其詩有曰陽遇午門當返照陰逢雞嶺急須回故十一起亥陽命遇丑而返陰命遇酉而回舉世用之殊不察理之所在其法十一起亥二十在丑三

十在子四十在亥矣今逐年行運三十九歲在卯四十乃在寅寅與亥相去四位一凶一吉何去何從先賢立法宜不如此之舛且戾也惟朱子美家藏父祖秘書得其全法頗合於理未嘗語人其詩有曰陽遇牛門當返照陰逢雞嶺急須回跳過三宮雙女位一年一位逆歸來陰遇午申為大利陽逢寅子永無災得此全法乃合身壬之運其流年所至悉與起數脗合如四十在亥流年四十亦至亥並無差舛乃知剽切之學誤天下後世多矣此大而要切者其疎繆且

如此况其他星煞乎大抵吉凶星煞不外乎數此法自壬而起壬水數一故起法悉本於一運於三而成於五合三五之一之數以為用此所謂身壬之法也立法而不本於理不合乎數吾未敢以為智者之創法也

陽命一十起亥二十子三十丑三十一越三位而在巳順至子得四十陰命逆行一十起亥二十戌三十酉三十一申三十四至巳三十五丑

赤口煞

赤口小煞耳人或忤之率多鬪訟原其起法以四位求之常值於巳以十二支求之常值辰戌蓋魁罡乃

天之惡神巳位屬蛇有嚙人之毒也然用之亦活法
不可以此小害遽廢良日如赤口值寅巳酉戌則不
可用餘皆無害蓋四位所屬皆能以口傷物其煞乃
行他位值之不必盡避

驛馬是先天三合數

八卦未畫數泯於理自天出河圖而後有先天之八
山先天之數由是出焉故大撓氏作六十甲子亦以
一二三四五而定火土金木水之數聖賢立法未有
不參於理本於數者也今世之所謂驛馬者先天三

合數也先天寅七午九而戌五合數二十有一故自
子順至申凡二十有一而爲火局之驛馬亥卯未之
數四六與八合爲十八故自子順至巳凡十八而爲
木局之驛馬木火陽局也從子一陽而順轉金水陰
局也從午一陰而逆行故甲子辰之數七九與五合
爲二十有一故自午逆至寅凡二十有一而爲水局
之驛馬巳酉丑之數四六與八合爲十八故自午逆
至亥凡十有八而爲金局之驛馬此驛馬之法所由
立也

三刑是極數

子卯一刑也寅巳申二刑也丑戌未三刑也自卯順至子子逆至卯極十數而爲無禮之刑寅逆至巳巳逆至申極十數而爲無恩之刑丑順至戌戌順至未極十數而爲恃勢之刑故皇極中天以十爲殺數積數至十則悉空其數天道惡盈滿則覆也此三刑之法所由起也

六壬三殺乃先天四衝數

壬式之忌莫大於三煞三命家謂之破碎陰陽家之用莫先於身壬而身壬之忌亦莫大於三煞犯之則禍常不赦世人徒用之而不知其所以然也蓋巳酉丑者五行之殺氣也而巳酉丑之所以爲殺者先天數之四衝也夫子午之數各九卯酉各六總爲三十自子順行極三十而見巳是爲四仲之正殺寅申各七巳亥各四總二十有二自子順行極二十二而見酉是爲四孟之正殺辰戌各五丑未各八總二十有六自子順行極二十六數而見丑是爲四季之正殺此壬申三殺之所由起也

貴人是十干合氣

甲戌庚牛羊乙巳鼠猴鄉自昔相傳以為貴人或者謂當以甲戌在牛羊云云庚辛逢馬虎為是兩位各主兩干在字與庚字相類六字與庚字相若此乃傳寫之誤始亦疑之後得其法則知當以古法為正此特後人妄議之耳蓋貴人者十干之合氣也其法以十干布十二支而辰戌不居對衝為虛夫辰戌乃貴人之獄所以不居貴人相對為天空故虛其衝也口貴順布甲在子甲與巳合乙在丑乙與庚合丙在寅丙與丁合丁在卯丁與壬合戊在巳戊與癸合己在午己與甲合庚在申庚與乙合辛在酉辛與丙合壬在亥壬與丁合癸在丑癸與戊合

對衝則虛之巳在未巳與甲合庚在申庚與乙合辛在酉辛與丙合壬在亥壬與丁合癸在丑癸與戊合十干順布十位巳周乃再以十干起申逆布之以求夜貴以甲在申乙在未丙在午丁在巳戊在卯寅為申之衝則虛之巳在丑庚在子辛在亥壬在酉癸在未一逆一順而晝夜二貴定矣且甲之起於子申何也蓋貴人屬土正位丑未乃坤卦二五黃中之合氣也先天卦之坤在正北子位河圖之坤在西南申方

故晝夜二貴所以起於子申也布而為圖一見可決

| | | |
|-----------------------|-----------------------------|-----------------------------|
| 申 <small>申</small> | 庚 <small>庚</small> | 辛 <small>辛</small> |
| 子 <small>子</small> | 對衝為虛 <small>對衝為虛</small> | 長戌不居 <small>長戌不居</small> |
| 亥 <small>亥</small> | 丑 <small>丑</small> | 寅 <small>寅</small> |
| 巳 <small>巳</small> | 未 <small>未</small> | 申 <small>申</small> |

黃白之術

世以黃白之術自詭者名為蕪客又曰爐火小則輕瘦金銀以為糝制大則結成丹母名曰匱頭持燕雀不生鳳狐兔不乳馬之文以證用母之說或切其真

母易以他物或制而為匱以邀重謝凡水銀入匱必食其母以成寶再三為之母氣既竭金銀已盡則水銀為煙燄之歸矣或有用汞以取銀之體用藥以食金之色養火見寶名曰隔窗取母或以金銀為鼎器實水銀於草藥煉而成寶名曰玉女翻身或以水銀膽凡煉於鐵鼎食頃成就然其體似銀則色黃而體頑似金則體堅而色淡似銅則質潤而色鮮蓋水銀食鐵之英華以為體膽凡變鐵之顏色以為黃自謂轉身便成真寶未有不為所欺者如葉荷之有水銀

灰菟之有鉛錫皆在七十二種龍牙草藥之數此又
爐火中之可觀者下此皆無足道不欲詳述士志於
道幸勿於此加意

燒金煉銀

道家有金丹之說故學者多以煨煉黃白爲事不知
金丹者人之真陽乃向上妙道借諭爲金卽禪宗之
所謂金剛不壞身取其不生不滅永劫長存具不漏
之體也丹者乾爲大赤純陽乾金故號爲丹豈徒以
黃白爲事况黃白之術神仙用以助安貧樂道之士

今志求黃白者心已貪甚豈肯授此以遂其貪哉借
使得之日成萬兩何救於生死大事况復不易可得
遂使設欺規利之徒投其所好多致敗家不思彼有
是術自能致富惟恐人知又何待以傳授資身也大
抵志於黃白者已非清高之士豈足以學道哉

煨硃砂說

硃砂體陽而性陰故外色丹而中含真汞也用遠志
龍齒之類煨之則可以養心用枸杞地黃之類則可
以補腎用南星川烏之類則可以驅風以胡桃破故

紙之類則可以治腰腎以川椒厚朴之類則可以實脾氣隨其佐使而見功無施不可向昧此理每得一方守以爲法歲月浸久所收既多所知稍廣因悟此理其後隨意用藥煉之無不適用每恨見之不早因以所得著之或可爲服食之助老於煅煉者試以此說質之亦必點首

服丹藥

金石伏火丹藥有嗜慾者率多服之冀其補助蓋方而變五鄉之用如腰金之兆金位也則以甲乙爲財爻金克木也以丙丁爲官鬼火克金也木兆則以戊己鄉爲財爻庚辛鄉爲官鬼其說尤爲合理而又有
一法則以五鄉之動者察其爲金木水火土之象隨本鄉而定吉凶如甲乙之鄉動而有金之象則爲官鬼有水之象則爲父母戰則不祥相生則吉所謂動者驛也戰者克也霽者食墨也蒙者不食墨也太史公以四時定吉凶其亦日辰變五鄉之義乎世無造妙之學其孰從而質之

刻漏說

自古刻漏必曰壺大幾何受水幾何又有水重水輕之別渴鳥之嘴吐水如髮惟恐不細向製此器以備火候之用出水入水爲製不同大抵一塵入水渴鳥旋塞未嘗有三日不間斷者中夜以思忽得其說但使渴鳥之水大如中針則小小塵垢隨水而下不復可塞不過倍受水之壺而已製器一成不復間斷深思其故始得其說因著之以傳好事者

大五行說

近世謝黃牛作大五行歌附會不經曲爲之說不足取

向爲先子卜地徧叩日者就叅地理之學雖各守其

師說深淺固未易知但二十四位之五行亦有兩說莫之適從自古所用大五行雖郭璞元經亦守其說謂之山家五行然先輩皆謂莫曉其立法之因旣無可攷之理古今豈肯通用而不疑者哉近世蔣文舉只用正五行以配二十四位壬癸亥子爲水丙丁巳午爲火一如三命六壬之說自謂得楊松筠之學又有蜀中一家謂是希夷先生之傳亦以子亥爲水巳午爲火與蔣說同而獨以壬位爲火其書則闔闢八卦消息律呂其行山定穴一以卦象律呂爲本上生

下生如黃鍾用林鍾之類是也年月日時則用卦氣
生旺如辟乾候大有之類是也其學行於東川為書
十篇卦爻律呂之用有陰有陽有消有破有生有合
其立法雖與蔣氏不同而五行之說甚不相遠然則
大五行之說果可廢乎可得而廢則古人何以更相
傳襲而用之於是深思其理求之太乙統紀之數而
不可得求之皇極先天中天之數而不可得求之後
天化合五運六氣之說而不可得反而求之卦畫於
是得其說焉分列於後庶幾易見

乾卦納壬甲 乾為天天一生水

戊 壬戌水 子 坎正卦 寅 甲寅水 甲 甲屬寅

水 辰 壬辰水 巽 壬辰水 申 甲申水 辛 乙酉水 辛屬酉

戊屬乾自戊順一周匝至辛而極乾陽極而變

坤故辛納乙

坤納乙癸 坤為君火

火 午 離正卦 丙 乙巳火 丙屬巳

乙 坤卦納 壬 乙亥火 壬屬亥

坤用乙而不及癸者六癸皆不化火也癸却自

化木

卯 震正卦 艮 癸丑木 艮屬丑

木 未 癸未木 巳 巳木

酉 兌正卦 乾 庚戌金 乾屬戌

金 亥 辛亥金 丁 兌卦納甲

土 坤 本宮正 丑 辛丑土

土 癸 庚子上 庚 戌申土 庚屬申

木受坤化終於巳之陰土

土受乾化終於戌之陽土

乾用壬申而生水坤乙生火而癸生木各主八位乾坤用足繼以長男長女庚辛運化金土攸定五氣迭布造化之功備矣本以卦蓋象數參之六十甲子始得窺其立法之端倪不悖經旨允合象數後有明者不易吾言矣

大五行出於乾坤者十二位出於六子者亦十二位合六子足以當乾坤之數蓋乾坤之策三百六十合六子之策亦三百六十足以當乾坤之策也但郭景純所載未本屬木而金土木各得四位故山家五行

不疑說
篇曰癸丑坤庚名稼穡艮震巳未曲直瘵今皆以未
屬土殆必有所據其理亦通木三金四土五是也然
一爲數之元總攝八位可也火何以不二不七而四
耶三說未知孰是將以質諸專門之學造理之士云
山家五行郭景純旣以名篇又於葬元一篇論坎坤
水土之山則曰崇土益申長坐位也及論艮山則曰
崇土益亥非木之長生乎論巽山則曰崇土益申水
長生也此又景純筆之書而用大五行之明證也
醫書有左癱右瘓之證人身一氣脉也一息往來骨

節毛竅何往不達及其感疾左癱者病不及左右瘓
者病不及左五臟六腑一而已矣豈有限界使左之
病不得右而右之病不得左耶夫五臟皆一而腎獨
有二左爲腎而藏精右爲命而藏氣神依氣立故曰
神門配壬子之水是以人之精敗者必左癱氣敗者
必右瘓兩腎各有所主故其病亦各有所歸壬子一
位也子屬水而壬屬火左腎配子右腎配壬子水爲
精壬火爲神五臟猶五行也六腑猶六神也甲乙配
青龍丙丁配朱雀庚辛配白虎壬癸配玄武戊乃配

勾陳巳乃配騰蛇蓋坎水納戊離火納巳故五行而有六神猶五臟而有六腑壬火子水之說近取諸身理尤明甚

辨歲本說

胡汝嘉歲本論謂今夜之子時卽是來日則今年之子月當爲來年立論詳而易明引證的而易信故近世多以十一月爲來年向因先子葬用子月悉主汝嘉之說或謂春夏秋冬一歲之叙也豈有冬而後春之理帝堯之曆象授時亦首春而次夏夫子謂行夏

之時以其得天道之正也兩說交戰於中深思其故久之乃得其說然後決以吾夫子之言爲正夫每日之有十二時者太陽隨天之運而周行於方隅之十二位也故日到子方則爲子時到午方則爲午時每年之有十二月者太陽麗天而歷於天輪之十二星次也是以日次子位堂虛宿之躔度而立春虛乃子位之正天中之一陽也天道左旋日次子而爲春之正月次亥爲二月次戌爲三月左旋而曆十二位以定十二月也地道右旋故每日之太陽在子位爲子

時順子丑寅卯歷十二位而定十二時也蓋太陽每
一日順行十二方隅而爲十二時太陽每一歲逆躔
十二星次而爲十二月胡汝嘉不曉曆法故爲此論
知天道更新於子而不知太陽次天輪之子爲更新
也是說也惟深於星曆者知之
正月建寅太陽次虛太陰次危日月皆在天輪之
子位此天道之一陽更新也

辨惑論

宋 謝廷芳

| | | | | | |
|----|----|----|----|----|----|
| 死生 | 疫厲 | 鬼神 | 祭祀 | 淫祀 | 妖怪 |
| 巫覡 | 卜筮 | 治喪 | 擇葬 | 相法 | 祿命 |
| 方位 | 時日 | 異端 | 老莊 | 佛氏 | 神仙 |
| 方士 | | | | | |

死生

論語曰死生有命

伯牛有疾子問之自牖執其手曰亡之命矣夫斯人

也而有斯疾也斯人也而有斯疾也

孟子曰天壽不貳修身以俟之所以立命也

莫非命也順受其正是故知命者不立于巖牆之下
盡其道而死者正命也桎梏死者非正命也

荀子曰相命已定鬼神不移

生人之始也死人之終也始終俱善人道畢矣

家語云命者性之始死者生之終有始則有終也

疫癘

世俗以疾咎鬼神者衆矣至疫氣流行則曰有主疾

之神家至而戶守之妖由巫興互相煽惑是故病疫
之家人皆惴惴焉無敢踵其門而問者甚而父子兄
弟亦不相救傷風敗俗莫甚于斯故述此于死生之
後以曉之

鬼神

北溪陳先生曰鬼神一節說話甚長本意作一項論
又以古人祭祀作一項論又以後世淫祀作一項論
又以後世妖恠作一項論旨哉斯言苟不先述古人
所謂鬼神祭祀之說則其理不明不述後世淫祀妖

惟之說則又何以寤世俗之疑邪

子路問事鬼神子曰未能事人焉能事鬼

禮記曰明則有禮樂幽則有鬼神

宰我曰吾聞鬼神之名不知其所謂子曰氣也神之盛也魂也者鬼之與神教之至也衆生必死死必歸土此之謂鬼骨肉斃于下陰爲野土其氣發揚于上爲昭明焄蒿悽愴此百物之精也神之著也

鬼神之爲德其盛矣乎視之而弗見聽之而弗聞體物而不可遺使天下之民齋明盛服以承祭祀洋洋乎如在其上如在其左右
鬼神者二氣之良能也

釋氏道家之論鬼神可笑之尤者也

祭祀

予生長吳楚間每見邑里之人歲時蒸嘗皆非然食飲而已至于山川鬼神妄言徼福動輒致大牲以祀享之問之則曰名山大川禮所當祭其亦不思之甚矣夫禮莫大于分今以一夫之微而欲僭王侯公卿之祭其越分踰禮爲何如哉若是者不獲戾于鬼神

幸也況求福乎故愚采輯前言獨詳于上下之分祭告不同以破不知者之惑若夫籩豆之事則不盡錄天子祭天地祭四方祭山川祭五祀歲編士祭其先夫聖王之制祭祀也法施于民則祀之以死勤事則祀之以勞定國則祀之能禦大菑則祀之能捍大患則祀之

淫祀

祭不欲數數則煩煩則不敬祭不欲疏疏則怠怠則忘淫祀之說經有明訓有常慮愚俗惑之殊足爲恠

至學士大夫亦從而惑之斯可恠矣余自先人沒卽以所事神影祀之以其非義故也大曆中大疫作母氏以及同產皆通虐務求藥不事所禱旣而病者俱瘥予則無恙時鄰里從淫祀者適多斃于疫或以是頗嘆異之觀此亦可見淫祀之不足信孔子曰非其鬼而祭之誦也

禮記曰非其所祭而祭之名曰淫祀淫祀無福

妖怪

孔子不語恠今予有妖怪之事乃力言之何也誠以

俚俗相煽邪風盛行不得不辨知者或可少祛其惑矣

鄭厲公問申繻曰人猶有妖乎對曰人之所忌其氣酸以取之妖由人與人無釁焉妖不自作人棄常自妖興故有妖

王沂公作郡時訛言有怪物夜飛下食小兒者遠近相恐未昏則撻戶滅燭匿童稚以黃緡薰爐置門用爲厭勝公聞之戒徹巡之吏悉令屏去有爲先倡者捕而重笞逐出于境民情遂安妖訛乃止

巫覡

予蚤歲見巫者爲親戚祀神吐鄙俚之詞徼漫漶之福輒羞赧去之旣長卽拒絕其人雖見之亦不爲禮嗚呼閭閻無知輩信而用之固無足責若夫士大夫亦信且惑焉能無愧乎苟欲正風俗息妖妄擯巫者不用其在大夫家始耳

西門豹爲鄴令問民所疾苦長老曰苦爲河伯娶婦豹曰至時幸來告吾及告豹往會河上見巫女數十人立大巫後豹呼河伯婦視之曰是女不好煩大巫

辨惑論
爲姬投之河中有項曰何久也弟子趣水久投三弟
子豹曰巫姬女子不能白事煩三君爲人白之復投
三老河中良久欲使廷掾等人趣之皆扣頭流血乃
免自是不復言河伯娶婦范氏曰夫惑鬼神聽巫覡
者匹夫之愚也

卜筮

卜筮之說尚矣予但嫉夫今之卜筮者誣罔百端與
古相戾無足取信如占疾苟能斷其安危決其吉凶
可也今也必曰某神禍之某鬼祟之禱則生否則死
吁何其卦之間灼見鬼神如是耶其它妖妄大率類
此予之所以不信者此也非謂無著龜之靈也曆傳
記述見聞集此篇與知者

書曰朕志先定詢謀僉同鬼神其依龜筮協從

易曰初筮告再三瀆瀆則不告

禮記曰人無恒不可以爲卜筮

卜筮者先聖王所以使民信時日敬鬼神決嫌疑定
猶豫也

左傳曰卜以決疑不疑何卜

荀子曰日月食而救之天旱而雩卜筮而後決大事
非其爲得求也以文之也

程子曰古者卜筮將以決疑也今之卜筮則不然計
其命之窮通詰其身之達否而已噫亦惑矣

治喪

喪祭之廢久矣今流俗之弊有二而廢尤甚其一鋪
張祭儀務爲觀美甚者破家蕩產以侈聲樂器玩之
盛視其親之棺槨衣衾反若餘事也其二廣集浮屠
大好作佛事甚者經旬踰月以及齋羞布施之盛視

其衰麻哭踊反若虛文也斯二者非移害之甚者乎
然而祭義之設惟有力者能之若浮屠之事習以成
俗無有貧富貴賤之間否則人爭非之殊不知彼浮
屠之有識者猶以其事爲耻可不悟哉子游曰喪至
乎哀而止今也苟未能純用古禮必先去此二者之
弊以盡夫哀痛慘怛之實則禮惟不足不可以佛畔
于道

子游問喪具夫子曰稱家之有無子游曰有無惡乎
齊夫子曰有無適禮苟能斂手足還葬而封之豈有

辨惑論
非之者哉

擇葬

擇地以葬其親亦孝子慈孫之用心也但後世惑于風水之談徃徃多爲身謀使其親骨肉不得以時歸土又不若不擇之愈也今予首述前輩端確之論以破偏信者之惑後以考亭西山之言折衷之

相法

相形之術近世或有精之者然致遠恐泥君子不爲愚嘗觀聖賢亦自有觀人之法人特不察耳孔子曰視其所以觀其所由察其所安人焉廋哉孟子曰眸子不能掩其惡胸中正則眸子瞭焉胸中不正則眸子眊焉聽其言也觀其眸子人焉廋哉聖賢觀之如此而已若夫死生禍福又豈顏貌間所能盡邪許負之書吾未之學乃所願則學孔孟

祿命

昔之人以陰陽五行推測祿命而知生死禍福亦間有奇中者矣論其拘泥又不啻如相法焉若今之汎汎售其術者尤不足信知命君子何以惑爲愚嘗謂

聖賢知人死生禍福而非陰陽五行之術也孔子曰由也不得其死其累戰歿于衛孟子曰死矣盆成括未幾見殺于齊蓋由也行行有不得其死之理括也小有才未聞君子之大道有足以殺其軀之理雖當時亦有獲免聖賢之言猶信也然則學者亦當如此而已祿命之書雖或億中何足信哉

方位

方位細事也然庸巫謬卜從而神之禁忌百端祈禳無已甚爲愚俗

時日

夫內事用柔日外事用剛日者聖人順陰陽之理初不以死生榮辱貧賤富貴之類一皆繫乎年月日時之吉凶而使人拘拘焉擇而用之孟子曰天時不如地利地利不如人和舉一物而天下之物莫不皆然亦盡乎人事而已夫時日者何足泥哉

異端

古之爲異端邪說者衆矣若老莊仙佛之流自秦漢以來惑世尤甚故特舉此而詳其說餘不盡述也先

新惡論
正有言曰邪說害正人人得而攻之不必聖賢如春秋之法亂臣賊子人人得而討之不必士師吾于此亦云

老莊

楊子曰老子之言道德吾有取焉耳及槌提仁義絕滅禮樂吾無取焉耳又或問莊周有取乎曰少欲鄙衍有取乎曰自持至周罔君臣之義衍無知于天地之間雖鄰不覿也

佛氏

或問佛之理比孔子爲徑先生曰天下果有徑理則仲尼豈欲使學者迂遠而難至乎故外仲尼之道而由徑則是冒險阻犯荆棘而已
或者曰佛之意亦欲引人爲善豈不有助于世而闢之深耶應之曰善無惡之稱也世之無父無君者惡乎善乎

神仙

或問長生神仙之道文中子曰仁義不修孝弟不立奚爲長生甚矣人之無厭也

方士

至元間方士請煉大丹世祖勅中書供給所需平章
政事廉希憲奏曰前世人主多爲方士誑惑堯舜得
壽不假靈于太丹也上曰然已

善誘文序

丹穴老人吾家之長兄也僻好編集戒殺之文傳於
世因戒而得善報者則編之因不戒而得惡報者則
不敢編也雖然猶慮人不喜觀復以前賢警世格言
渾殺乎其間聊欲誘人之一觀也或問之曰丹穴老
人何苦如是 吾兄乃屈指笑而言曰予不願如楊
寶得玉環予不願如宋郊奪魁選予不願如竇禹鈞
有五枝芳予不願如黃兼濟登仙籍但願予在世蔬
食菜羹不敢不飽飯疏飲水樂在其中如斯而已盡

善誘文序
乎天年既沒之後願如壽師不見閻王徑歸淨土得
幸西方聖人講論佛道且無輪迴之苦死喪之戚豈
不樂哉 吾兄喜得此理欲與世人共之俾弟鍊趣
刊版而印施之日曰善誘文噫觀 吾兄之所編則
善誘之意可知矣

嘉定十四年辛巳歲重陽日弟鍊再拜謹序

序終

善誘文

丹穴陳錄

趙清獻公座右銘

依本分 無煩惱

莫妄想 常快樂

待則甚 一任他

怎奈何 休理會

知足勝持齋 萬事隨緣
何須特地

無求勝布施 無求自安
布施貪福

善誘文

懼法朝朝樂

懼則不為心地常樂

欺公日日驚

欺則自知心豈不驚

爭先徑路機關惡

急於趨利用心必惡

近後語言滋味長

謙退自守情況甚佳

爽口味多須作疾

偏勝之味疾疹隨作

快心事過必為殃

一時快意事過傷身

得便宜處莫再去

得失無常事不可必

怕人知事莫萌心

先察可否然後起意

盛喜中勿許人物

不副所願即成妄語

盛怒中勿答人簡

既形紙筆溢語難收

無心於事無事於心

兩者既無即得解脫

聞諸惡言如風如響

彼自妄發何須理會

人有不及可以情恕

真心便息事過無悔

非意相干可以理遣

當一無事胸中泰然

良田萬頃日食二升

一飽之外皆他人享

大厦千間夜臥八尺

一席之外皆是餘地

說得一尺行得一寸

說而不行損氣無益

但行好事莫問前程

好事若行前程自在

善言
超然居士六法圖

日用八如

無私如天地光明如日月靜重如須彌深廣如大海
無住如虛空隨順如流水榮辱如空華冤親如夢幻
守此八如一生事畢

省心雜言

聞善言則拜告有過則喜有聖賢氣象 和以處眾
寬以接下恕以待人君子人也 誠無悔恕無怨和
無仇忍無辱 以責人之心責已則寡過以恕已之

心恕人則全交 寡言省謗寡慾保身 多言獲利
不如默而無害 以忠孝遺子孫者昌以智術遺子
孫者亡以謙接物者強以善自衛者良 爲子孫作
富貴計者十敗其九爲人作善方便者其後受惠
耳不聞人之非目不視人之短口不言人之過庶幾
爲君子 廣積不如教子避禍不如省非 屈已者
能處眾好勝者必遇敵 結怨於人謂之種禍捨善
不爲謂之自賊 孝於親則子孝欽於人則眾欽
內睦者家道昌外睦者人事濟 食能止饑飲能止

渴畏能止禍足能止貪 知足則樂務貪則憂 爲
政之要曰公與清成家之道曰儉與勤 不自重者
取辱不自畏者招禍不自滿者受益不自是者博聞
吉凶悔吝非天無有不由已者 張飽帆於大江驟
駿馬於平陸天下之至快反思則憂處不爭之地乘
獨後之馬人或我嗤樂莫大焉數文李士舉撰

司馬溫公訓儉

孔子曰奢則不遜儉則固與其不遜也寧固又曰與其奢也寧儉又曰以約失之者鮮矣又曰士志於道

而耻惡衣惡食者未足與議也古人以儉爲美德今
人以儉相耻病嘻異哉昔張文節知白爲相自奉養
如河陽掌書記時所親或規之曰公受俸不少而自
奉如此雖自信清約外人頗有公孫布被之譏公宜
少從衆公歎曰吾今日之俸雖舉家衣錦玉食何患
其不能顧人之常情由儉入奢易由奢入儉難吾今
日之俸豈能常有身豈能常存一旦異於今日家人
習奢已久不能頓儉必至失所豈若吾居位去位身
存身亡如一日乎嗚呼賢者之深謀遠慮豈庸人所

善言文
及哉御孫曰儉德之共也侈惡之大也共同也言有
德者皆從儉來也夫儉則寡欲君子寡欲則不役於
物可以直道而行小人寡三則能謹身節用遠罪豐
家故曰儉德之共也侈則多欲君子多欲則貪慕富
貴枉道速禍小人多欲則多求妄用敗家喪身是以
居官必賄居鄉必盜故曰侈惡之大也 丹穴老人
曰知溫公之訓儉又當知其所以儉儉之中禮人皆
悅服儉不中禮人皆鄙之故處己以儉謂之德待人
以儉謂之鄙予恐世人守溫公之訓馴致於鄙吝怪

嗇也故云爾

范文正公義田記

范文正公蘇人也平生好施與擇其親而貧疏而賢
者咸施之方貴顯時於其里中買負郭常稔之田千
畝號曰義田以養羣族之人日有食歲有衣嫁娶凶
葬皆有贍擇族之長而賢者一人主其計而時其出
納焉日食人米一升歲衣人二縑嫁女者錢五十千
娶婦者錢二十千再嫁者錢三十千再娶者十五千
葬者如再嫁之數葬幼者十千族之聚者九十歲

入稷稻八百斛以其所出給其所聚需然有餘而無窮仕而家居俟代者預焉仕而之官者罷其給此其大較也初公之未貴顯也嘗有志於是矣而力之未逮者二十年既而西帥以至於叅大政於是始有祿賜之入終其志公既沒後世子孫至今修其業承其志如公存也公雖位充祿厚而貧終其身既沒之日身無以爲歛子無以爲喪惟以施貧活族之人遺其子而已公之忠義滿朝廷事業滿邊鄙功名滿天下其必有良吏者書之子可無書也獨書其義固以警

於世云公諱仲淹字希文嘉祐四年八月十日晉陵錢公輔記

黃承事儲穀濟人

尚書張詠守成都嘗夜夢詣紫府真君繼請到西門黃承事真君降階接之其禮甚恭揖張尚書坐承事之下夢覺莫知所謂明日問左右西門有黃承事否左右云有亟命召之戒令具常服來既至果如夢中所見者卽以所夢告之問平生有何陰德真君禮遇如此又坐吾上再三叩之不獲已承事云別無他長

惟每歲收成之時隨意出錢收糶米糧候至來年新陳未接之際糶與細民價例不增升斗如故尚書歎曰此宜居我之上也使兩吏掖之而拜世傳紫府真君主天下神仙籍如張尚書黃承事亦皆在籍中而黃承事又居其上其子孫青紫不絕非賑濟陰德之大者所致然耶黃承事諱兼濟

竇諫議陰德記

竇禹鈞范陽人生五子儀儼侃偁僖儀禮部尚書儼禮部侍郎皆爲翰林學士侃左補闕侃左諫議大夫

叅知政事僖起居郎初禹鈞家豐厚年三十無子夜夢祖考謂曰爾早修行緣爾無子又壽不永禹鈞唯諾禹鈞爲人素長者先有家僮盜用房錢二百千慮事覺有女年十二三自寫券繫女臂云永賣此女與本宅償所負錢自是遠遁禹鈞見而憐之卽焚其券以其女囑妻曰善撫養之旣笄復以二百千擇良配得所歸後僕聞之乃歸感泣訴以前罪禹鈞不問由是父子圖禹鈞像晨興祝壽同宗外姻有喪不能舉公爲出錢葬之因公而葬者凡二十七喪孤遺女貧

不能嫁者公爲出錢嫁之由公而嫁者凡二十八人故舊相知雖與公有一日之雅遇其窘困必擇其子弟可委以財者隨多寡貸以金帛俾之興販由公活者數十家四方賢士賴公舉者不可勝數公每歲量所入除伏臘供給外皆以濟人之急家惟儉素器無金玉之飭室無衣帛之妾於宅南建書院四十間聚書數千卷禮文行之儒延致師席凡四方孤寒之士無供月者公咸爲出之無問識不識有志爲學者聽其自至故其子見聞益博由公之門登貴仕者前後

接踵朱拜公之門必命左右扶公坐受及公之亡蒙公恩者有持心喪三年以報遺德公之祖考旣夢以告無子壽促後十年復夢告之曰汝三十年前實無子且壽促我常告汝今汝數年以來名掛天曹陰府以汝有陰德特延壽三紀賜五子各榮顯仍以福壽而終後當留洞天充真人位言訖復謂曰陰陽之理大抵不易善惡之應或發於見世或報於來生天網恢恢疎而不漏此無疑也公愈積陰功年八十二別親戚談笑而盡世稱教子者必曰燕山竇十郎云仲

淹祖與之爲故人實書其事于策以示子孫惜乎不傳于天下故錄以示好善者庶見陰陽報應之理使惡者知所戒焉馮瀛王道贈公詩云燕山竇十郎教子有義方靈椿一株老仙桂五枝芳叅政范仲淹記

修爲果報

儒家言施報佛家言布施果報其實一也佛言欲得穀食當勤耕種欲得智慧當勤學問欲得長壽當勤戒殺欲得富貴當勤布施布施有四一曰財施二曰法施三曰無畏施四曰心施財施者以財惠人法施

者以善道教人無畏施者謂人及衆生當恐懼時吾安慰之使無畏或教以脫離恐懼使無畏心施者身雖不能濟物常存濟物之心佛以孝養父母亦爲布施是凡施於外者皆爲布施故爲下而忠難事上爲長而仁慈安衆爲師而謹於教導爲友而誠於琢磨一言一話之間必期有益一動一止之際必欲無傷種種方便利物勿使有所損害皆布施也所爲如此存心又如此後世豈得不獲富貴之報古語云人人知道有來年家家盡種來年穀人人知道有來生何

不修取來生福是今生所受之福乃前世所修者猶
今歲所食之穀乃前歲所種者人不能朝種穀而暮
食猶不能旋修福而卽受所以穀必半歲福必隔世
也孔子謂旣以爲人已愈有旣以與人已愈多皆布
施之謂曾子謂出乎爾者反乎爾老子云天網恢恢
踈而不漏皆果報之謂是儒道二教皆言施報但不
言隔世爾佛以此身爲報身爲報我前世所爲故生
此身所以貧富貴賤榮枯壽夭種種不同則前世所
爲不同亦可知矣龍舒王日休撰

好生之德

天地以好生爲德故羽毛鱗介無一不遂其性諸佛
以慈悲爲念故蠢動含靈無一不適其情此無他只
是存心廣大一切衆生皆吾愛子一切血屬皆吾性
命則放生詎可緩耶世人當知戒殺止足以解物之
冤若能放生不唯與物爲恩又集無窮之福今人處
世豈無所願子孫則欲其昌榮名利則欲其超勝以
至學道學佛必欲善行圓滿早成正覺余見世人皇
皇百計求是數者無一如意曾未知放生因果其效

甚速不觀古人已驗之事難發好生慈悲之心漢楊
寶救一黃雀報以玉環令生清白子孫其後震秉賜
彪四世三公觀前人子孫昌榮如此則凡爲子孫計
者可不以放生爲急乎宋莒公戲編竹橋以度羣蟻
遂魁天下福祿壽考當世無比觀前人名利超勝如
此則凡爲名利計者可不以放生爲急乎孫真人解
衣贖蛇得水府活人之方遂登仙籍壽禪師盜錢放
生恬不畏死遂爲大善知識則道佛之獲報應又如
何耶且放生之門非止一端或舉於四月八日供佛

之時或施於慶誕日祝壽之際或遇本命或因疾病
或過門而憐其無辜或出路而見其可憫皆因果也
會稽丁銳撰

人與物同

貪生畏死人與物同也愛戀親屬人與物同也當殺
戮而痛苦人與物同也所以不同者人有智物則無
智人能言物則不能言人之力強物之力則微弱人
以其無智不能自蔽其身以其不能言而不能告訴
以其力之微弱不能勝我因謂物之受生與我輕重

不等遂殺而食之凡一飲一食不得肉則不美至於辦一食又不止殺一物也食鳩鴿鶻雀者殺十餘命方得一羹食蚌蛤蝦蜆者殺百餘命方得一羹又有好美味求適意者則不止據現在之物順平常之理殺而食之或驅役奴隸遠致異品或畜養雞魚犬豕擇肥而旋殺生蟹投糟欲其味入鞭魚造膾欲有經紋聚炭燒蚌環火逼羊開腹取胎刺喉瀝血作計烹煎以意闕飢食之既飽則揚揚自得少不如意則怒罵叱者嗟乎染習成俗見聞久慣以爲飲食合當如

此而不以爲怪深思痛念良可驚懼縣令俞偉撰

衆生愛戀性命

經云一切畏刀杖無不愛壽命故王克殺羊羊奔容而拜訴鄒文立殺鹿鹿跪而流淚驚禽投案請命於魏君窮獸入廬求生於區氏近者沈遇內翰通判江寧府時廚中殺羊屢失其刀窺之乃見羊銜刀而藏之牆下周豫學士嘗煮鱖見有鞠躬向上而以首尾就湯者剖之見腹中有子乃知鞠躬避湯者以愛子之故楊傑提刑遊明州育王山因晝臥夢有婦女十

善講文
數人執紙若有所訴密遣人往視行厨果得蛤蜊十
數枚訴者乃蛤蜊求生也有生愛戀其情如此當其
被擒執時前見刀杖乞生無由旁見親聚欲戀不得
抱苦就終銜悲向盡既受屠割復入鼎鑊種種痛苦
徹入骨髓當此之時彼心如何今人或爲湯火所傷
或爲針刀誤傷手足痛已難忍必號叫求救至暫時
頭昏腹痛或小可疾病便須呼醫買藥百端救療於
我自身愛惜如此至於殺物則恣意屠宰不生憐憫
未論佛法明有戒勸未論天理明有報應若不仁不

恕惟知愛身不知愛物亦非君子長者之所當爲也
諦觀物情當念衆生不可不戒不可不戒知縣俞倅
撰

受用隨分說

佛言受卽是空受謂受苦受樂及一切受用也如食
列數味放筯卽空出多騶從旣到卽空終日遊觀旣
歸卽空又如爲善事旣畢其勤勞卽空而善業具在
爲惡事旣畢其快意卽空而惡業具在若深悟此理
則食可菲薄無過用殺害之寃債出可隨分無勞心

苦人之煩惱遊觀可息無放蕩廢事之愆尤善可勉
爲無懈怠因循之失惡可力戒無恣縱怨讎之罪余
喜得此理願欲與人共之龍舒王日休撰

五戒之首

佛言五戒以殺戒爲首佛言十業以殺業爲首楞伽
經云若一切人不食肉者亦無有人殺害衆生由人
食肉故屠者殺以販賣若能悉捨不食是真修行堪
受一切人天供養若於食肉未能盡斷願且以漸次
方便除去殺心或者不食四等肉一者曾見殺則不

食二者曾聞殺則不食三者人專爲我殺則不食四
者家所自殺則不食如是而戒旣不廢常食且於衆
生無殺害意至一蚤蝨蚊蚋形雖微小其遭殺受痛
亦與牛羊一等勿謂微小便輕殺之至於蛇蝮蜂蝎
偶然現前未曾傷人勿謂螫毒便輕殺之至於籠養
飛鳥繫閉走獸爲其音聲形狀可以悅吾耳目爲我
玩樂令彼憂愁又何不仁也若放之山林使得自在
何異罪囚得脫牢獄今日自戒矣遂生慈心慈心旣
堅當世世無殺物之意一身自戒則一家必不殺一

善言文
家不殺則一鄉必漸效之其爲功利不可稱量佛語
無虛理又明白仁人君子幸垂聽而無忽也縣令俞
偉撰

東坡放生

蘇東坡自謂竄逐海上去死地稍近心頗憂之願學
壽禪師放生以證善果敬以亡母蜀郡太君程氏遺
留簪珥盡買放生以薦父母冥福其子邁在東坡之
側見所買放生盈軒蔽地或掉尾乞命或悚翅哀鳴
邁憐悲其意亟請放之旁有侍妾名朝雲見邁衣袵

有蟬動視之乃蝨也妾遽以指爪隕其命東坡訓之
曰聖人言近取諸身遠取諸物我今遠取諸物以放
之汝今近取諸身以殺之耶妾曰柰齧我何東坡曰
是汝氣體感召而生者不可罪彼要當拾而放之可
也今人殺害禽魚之命是豈禽魚齧人耶妾大悟自
後罕茹腥物多食蔬菜而已東坡舅氏諭之曰心卽
是佛不在斷肉東坡曰不可作如是言小人女子難
感易流幸其作如是相有何不可

黃魯直謂子瞻語

黃魯直謂子瞻曰鳥之將死其鳴也哀某適到市橋
見生鶩繫足在地嗚叫不已得非哀祈於我耶子瞻
曰某昨日買十鳩中有四活卽放之餘者幸作一杯
羹今日吾家常膳買魚數斤以水養之活者放而救
渠命殪者烹而悅我口雖腥膻之慾未能盡斷且一
時從權爾魯直曰吾兄從權之說善哉魯直因作頌
曰我肉衆生肉各殊體不殊元同一種性只是別形
軀苦惱從他受肥甘爲我須莫教閻老到自揣看何
如子瞻聞斯語愀然歎曰我猶未免食肉安知不逃

閻老之責乎

樂善錄

宋 李昌齡

心者善之本也究夫所本末始不善不幸富貴利害者汨之故不善之心由是而生其間能不失其本者百無一二焉是以無富貴無貧賤作善者常少而作不善者常多無足怪也然予嘗目擊世間積善之士鮮有不終吉者故易曰積善之家必餘慶又曰善不積不足以成名噫聖人之言豈欺我哉予少也賤負笈四方經歷世故屢嘗患難凡所聞見踐履有益

於人而可補於世者未嘗不積於中爰摭管見哀集
得若干餘事目曰積善錄皆所言修身積德濟物也
願與天下善士共行之自王公至於庶人咸知積善
之爲終吉故言不文辭不飾每事直述其旨要在明
道理達倫類辨是非通世務使賢愚貴賤皆得以洞
曉之或曰子之言可謂達理若更加潤色則盡善矣
余曰不然本朝文章之盛超軼漢唐所不足者節義
區區之見蓋在警世諭俗利物濟人何以文爲所患
其間類逆耳骨鯁之言與世俗違者甚多未免有毀

譽之私然而公言在我好惡在彼吾何容心哉若夫
增廣善事削其繁蕪則有賴於明哲君子時淳熙戊

戌冬月序

嚴正

爲父而不能盡父之道則家無孝友之子爲師而不
能盡師之道則門無行藝之士爲子而不能盡事父
之道則爲不孝爲弟子而不能盡事師之道則爲不
知斯四者天下之大經誠不可違也苟欲盡夫爲父
爲師之道者無他惟嚴與正而已制之以嚴教之以

正罔不盡善雖文王爲父仲尼爲師不過如是也苟欲盡夫事父師之道者無他惟敬與順而已敬之以禮順其教命則罔有不令雖曾參之爲子顏回之爲弟子不過如是也蓋父猶天也師猶父也其勢雖殊其尊一也爲人而不能盡事父師之道者逆天者也是人也若無人禍必有天刑或曰如彼之頑嚚而嚴不足以制之正不足以教之則嚴正何所措諸子對曰誠有是事也然果人也庸有治之以嚴正而不率者乎苟嚴正不足以治之則非人矣任之可也嘗觀

堯舜不能化朱象蓋凡此徒者不可謂之人也人之類而已此韓愈所謂夷狄禽獸皆人者是也予欲天下之爲父子師弟子者各盡其道故發斯言

自守

夫人之爲人莫善於能自守故孟子曰守孰爲大守身爲大守身守之本也蓋言人能守其身則能守其本既能守其本則其末者無所不守小而子女玉帛富貴爵祿大而宗廟社稷家國人民皆可守也苟不能自守其本而貧賤得以移其志得喪足以動其心

如此則非其道非其義非其法者安能保其不爲如是則雖小者亦不能自守矧能守其大者乎柰何士之爲士奚可不自守能自守則不失其爲富貴顯達爲士君子不能自守則不失其爲貧賤窮困爲愚無知斯二者斷無疑矣故曰人之爲人莫善於能自守

陰德

人之處世不可不積陰德夫不積陰德者未見其有後也故于定國父治獄多陰德而知其子孫必興孫叔敖有埋蛇之陰德而母知其必貴信有之矣然陰

德亦甚易積不以富貴有力者雖尋常之人皆可積也蓋所謂積陰德者非謂廣散金穀多方布施齋設僧道建造寺觀然後謂之積陰德凡爲此者乃愚人作業福非積陰德也或曰何謂業福予對曰蓋彼所聚之財取之多不義取不義之財而廣布施設齋供故謂之作業福非積陰德者也夫所謂積者常操不害物之心出入起居種種行方便如此便是積陰德也今姑以其小者言之如蛾之赴火螳之墮淵而吾能救之亦是積陰德矧夫人有饑寒吾能飽煖之人

有疾厄吾能安樂之救人患難解人之仇怨濟人之困貧不沒人之善不成人之惡不言人之過凡此之類皆積陰德也積德之士苟常以方便存心隨力行之不已則陰德亦厚矣殆見天之報也莫匪福壽之增崇門戶之盛大子孫之榮顯有不可辭者予言不欺力行之可也

戒殺

經曰大夫無故不殺牛士無故不殺犬豕至於王者郊祀然後用特牲此禮制然也所以別尊卑之分也後世壞法棄禮雖庶人而竊食牛牲矧於羊豕乎以庶人而食祀天之品物非惟有罪縱有福如天亦消去矣蓋彼有不可食者二祀天之物不敢食之有功於民不忍食之若夫道釋者流論食牛罪業之重報應之速予不復舉然而陰陽殊途罪福一致不言而喻凡此等事吾儕患乎不知知之安可不戒也

量飲

予嘗觀世俗會賓客不以貴賤未有不強人以酒者勸人以酒固非惡意然當隨人之量以勸之乃所以

盡賓主之歡也予聞范蜀公接待契丹勸酒虜使馮見善請曰勸酒當以量若不以量如徭役而不用戶等高下彼夷狄也猶且知勸酒以量矧吾儕生乎衣冠之國動容周旋務在中禮奚可以酒強人而使人失禮節亂情性甚至於吐唾而後已此殆不若夷狄之知禮實可耻也實可醜也好禮之士苟聞予言當改其過而新其德庶幾無愧古人賓主百拜酒三行之禮也

施惠

世間萬物久聚必散自然之禮也夫金穀寶貨雖萬乘之貴久聚亦散然彼所以散者蓋爲養天下而散也苟不爲此而散必若鹿臺鉅橋而散其散一也是言之則金穀寶貨國家不能久聚而不散也常人可久聚而不散乎予見世之愚者嘗聚金穀寶貨自謂可使子孫世世而不能散此真癡漢耳誠可恠笑及夫物之當散也不以水火去則盜賊去兵革獄訟去不肖子孫去此事自古皆然非止今日是故鄧通之銅山不能有萬日石崇之金谷何嘗傳百年金穀

樂善錄
寶貨不可久聚也如此故予欲積善之家常以其餘者廣施惠於親戚朋友故舊鄰里之不足者小民之貧困者人有患難疾苦者苟能如是而散之則彼將復聚於吾子孫者無有窮極蓋陰功陰德厚矣予特爲是說以勉世人迷而不悟者云君子母謂不知言也

僧道

僧道不可入宅院猶鼠雀之不可入倉廩也鼠雀入倉廩未有不食穀粟者僧道入宅院未有不爲亂行

者此事之必然不可隱者也予竊見富家兒常令僧道入宅院與婦人同起坐而不知耻殆其久而分熟則未有不爲彼所淫污者其間無知之輩至於事露醜出而亦不耻不禁悲夫世間如此等人何異於鳥獸乎予不忍聞見此等事惟欲賢者知之而今而後知僧道不可令入宅院故楚諺亦云此輩只堪林下見不宜引到書堂前

養生

人之養生唯不可不足若粗足以奉甘旨供祭祀養

樂善錄
妻子備凶荒之外夫復何用良田萬頃日食二升大
屢千間夜眠八尺何必區區勞心役已未歲窮年汨
汨於殖貨利哉夫如是者乃一守錢虜爲兒孫作馬
牛也或曰何謂作馬牛予對曰夫富者之爲利莫非
放債取厚利恃勢而兼并致使貧下之民終日逐利
以償其債負中人家終身營家業以待其吞併其
或事窮力盡則賣妻鬻子身爲奴僕而後已凡此之
類無非爲兒孫作馬牛也嗚呼不徒死作馬牛而且
生作馬牛矣彼所以不自知其爲馬牛者未變其頭

角與免鞭策耳苟曰爲子孫計則何不積陰德以遺
之開義方以教之使子孫自取富貴故易曰積善之
家必有餘慶傳曰愛子教之以義方何區區爲彼作
奴僕殖貨利哉倘子孫賢必能爲我守之其或不肖
則我聚而彼散反取笑於識者此理昭然不必賢知
者知其然雖愚者亦知其然也予嘗憫人之苟富貴
者不悟其身爲兒孫作馬牛故特爲是說以警之

室家

治室家御妾婦之道當以至正與夫仁術大抵婦人

樂善錄
女子之情性多淫邪而少正易喜怒而多乖率御之
以嚴則事有不測其情不知其內有怨蓋未有久而
不爲害者率御之以和則動多違禮其事多專其心
無憚蓋未有久而不爲亂者二者皆非君子所以處
家人之道其失均也故予謂君子之治室家御妾婦
當以正而使嚴行其中當以術而使寬在其中則無
太嚴太寬之弊然後率之以仁教之以義和之以禮
撫之以恩勿聽其言勿受其制勿從其役任以可責
之事使以不怨之勞有能不可太寵有過不可窮治

舉動不爲彼所識措畫不爲彼所料如是則彼之平
昔所可逞者皆在吾術中矣雖欲事不測而情不和
動違禮而事自專內有所怨心無所憚不可得也夫
是數者旣不可得而爲則君子之治家室御妾婦之
道如斯而已矣

子弟

今子弟之大失者有三自少卽思衣服之鮮華飲食
之豐美惟利己之驕惰安逸而不卹人之規正一也
不知誦讀經史惟事嬉遊度日稠人廣坐論古今之

道則懵無所知聞世俗之言則欣然而喜既不知耻習以爲常二也身既無學且復忌人之學故於勝已者則遠而不近於佞已者則悅而相親所言莫非庸下所思莫非頗僻三也有此三失父母兄弟所不喜君子長者所不與上官鉅人所不肯薦揚欲立身成名起家以其祖宗可乎苟能甘淡泊而務學問近有德而遠下流則所知者聖賢之道所聞者正大之言所交者正大之士所行者向上之事如此豈不足以成名乎哉爲子弟者幸毋以予言爲耄

此卷與東谷所見可補世範家箴

東谷所見

宋 李之彥

余間居兀坐觸事動心據所見隨錄友朋目之屢
請刊行不可辭然任意迅筆肆言無忌余所見與
人所見未必盡合也有見喜亦有見而怒知我罪
我其惟此見乎咸淳戊辰小春永嘉東谷李之彥

自序

先壠

人子之於親苟虧生事之禮雖塋與祭致其力何足

新記

以言孝故曰祭之厚不如養之薄吾鄉多於至節歲節清明詣墳所半載餘寘其親於荒墟已爲非禮乘祭之後大率與兄弟妻子親戚契交放情遊覽盡歡而歸至節歲節非掃松也祇賞梅耳清明非省墓也祇踏青耳然則人子何以處此當揆之於心平日稍能孝養雖祭後舉杯酌亦未害若孝養有虧卽當收歛酒饌返舍潛自尅責庶幾亦不至大得罪於名教大獲譴於造物余嘗喜一前輩作初入仕啓兩句云祿不及親飽妻孥而何益遂耦其兩句忠未報國對

師友以多慚

壽命福德

願我壽命長常行一切善願我福德盛普濟一切人此語恐未爲的論人之念慮一正則萬善可觸類而通行一善則萬善皆萌蘖於此若必待壽命長而後行一切善則壽命不長一切善必不行矣顏子如之何而造道耶此兩句猶庶幾如下兩句則有大不然者願我福德盛普濟一切人則是我獨富足人多窘匱我常得爲人之惠主人皆仰我以周給是誠何心

哉余欲改此兩句曰願人福德盛不待我普濟

殺人欠債

諺有之殺人償命欠債還錢理也近世豪家巨室威力使令逼人致死但捐財賄餌血屬坦然無事至如人或逋負督迫取償必使投溺自經然後已由此觀之乃是殺人還錢欠債償命

異端

士君子莫不知崇尚正學排斥異端然朝廷及州縣間遇旱澇凶荒非黃寇設醮則浮圖禮懺平日排斥

異端至此則倚仗異端豈吾儒之感格之道耶切所未喻

簡翰

每見近日簡翰動輒端拜申稟百拜稟申皇懼僭躐九頓百拜稟申有官君子趨事長官則有狀申劄申如申縣申州申監司申朝省之類吾輩家尋常書問往來何必用申字又有所謂加拜申稟尤爲可笑先王制禮無過不及拜豈可加也哉昔韓昌黎上宰相書只寫再拜本朝前輩簡翰或再拜或頓首昌黎諸

公豈傲世者正以禮不可過也今之端拜肅拜加拜
百拜又有覆帖申待平交如此事君父當如何其勢
必千拜萬拜可也且如奏疏亦只忱惶忱懼頓首頓
首而已何嘗百拜何嘗九頓吾不知習俗所尚果誠
實耶抑虛偽耶果謙遜耶抑諂媚耶因有一說往年
楊慈湖先生守吾邦嘗作一書付局兵令急出關未
幾遣人追回吏輩將謂書有錯誤局兵至慈湖取書
寘中堂几上焚香再拜畢復付之蓋爲書中寫頓首
再拜上覆偶遺忘不及拜必拜然後遣若加拜百拜

者皆如慈湖用心此等書一日能寫得幾封今簡翰
只寫再拜或頓首乃見古人相與之意

物價

物價騰踊甚之甚矣若得人人同心事事節損皆務
儉素不尚侈靡則物價亦可漸平室廬惟取容膝則
木石等類自不可得而貴衣服惟取蔽體則羅綺文
繡自不可得而貴飲食惟取充腹則美味珍品自不
可得而貴器具惟取適用則珍竒精巧自不可得而
貴以至非泛不切微末細瑣人家可省則省則物價

亦有漸平之理奈何風俗好奢人情好勝競尚華居
競服靡衣競嗜珍饌競用美器豪家巨族固宜嚮用
小夫賤隸卒富暴貴豈惟效尤又且過之或先期予
人以錢後期取人之物惟欲快吾之用度一聽其邀
價之高穹如此則物安得不貴且如有物于此我方
以爲僅直十金未幾人急欲得之雖倍其直不靳又
爭欲得之更倍其直亦不靳不遏踊貴之流反煽踊
貴之焰如此則物安得不貴甚可慮者一日復貴一
日一年復貴一年將若之何其勢必至於此吾故謂

不必咎物價之踊貴但當咎風俗之侈靡轉移風俗
豈無其道耶又豈無其術耶林野老拙不敢深言

養子

知子莫若父當年少時觀其讀書之利鈍行事之醇
疵卽可覘其終身之賢不肖也使其賢耶他日自能
成立何必勞心勞力積財以遺之而損賢者之志也
使其不肖耶他日必致敗壞又何必勞心勞力積財
以遺之而益不肖之過也縱不免儲蓄以爲憑藉之
計亦豈可妄求而自取損德之殃世廼有明見其子

之不肯猶挾兔狡而規利逞鼠技以貽謀殊不知一傳而傾覆有不待其父之瞑目而家貲已散而之他矣吁有此豚犬枉作馬牛

招師

招師教子弟正望其成人克紹實非細事不可忽也中產之家師席固不當需索富貴之家何待師席之需索書院中凡百自當如儀每見富貴者寧豐財多粟納好寵姬何嘗肯隆禮厚幣延好師席寵姬辦首飾則甚易子弟買書冊則甚難蘭房用度必是周緻

書院缺典寘之不問氣象如此宜乎碩師去而庸師來碩師有抱負有見識合則留不合則去庸師無學問以自持惟佞諛而媚主庸師固棲身之謀一年復留一年子弟乏開導之益一日昏鈍一日及其長也塊然一物而已耳

教導

嘗聞之先人曰昔一士子赴省試甚愜意在京華待榜因遊僧寺廊廡有鬻相者遂扣之相者曰公骨相寒苦縱才高班馬文過韓柳亦不能成名士子不信

揭榜果黜再往問我之終身果何如相者曰以公之骨相豈敢相許若於功名用心之切莫若種大陰德恐可以回造化士子歸途心口自語我居窮迫貧濟人利物事安能爲之何以種陰德徐而思之我平日常假館每見爲師席者多誤人家子弟我從今只留心教導以此種德後三年復預計偕赴省復愜意尋寺中相者尚在一揖間相者曰公丰神照人定應榮達士子曰我赴省待榜相者曰高中無疑揭榜果然士子往謝之曰何汝向者拒我之峻今日許我之確

耶相者曰某不記公丰采士子歷述前事相者曰公形骨俱換矣畱心教人非陰德而何宜造物之默相也余遊湖海四五十年教公卿大夫之子孫屢矣教導常白屋之類亦多矣未嘗以其貧富貴賤束脩多寡貳吾心此語可以對越但才名不就身計茫然靜坐反思得非生平五典不飭百行有虧造物特以摧敗困踣罰之耶今年六十有八肢體康健耳目聰明飲啗自若百病不侵意者教導一節亦有可取造物姑壽之耶余不敢自恕但一自警然見近時教童蒙

者語孟句讀亦多錯舛教作文者只謄公本蔑有新
功誤人子弟寧逃陰譴甚而花街柳陌師生同遊嗜
利下流靡所不至其間有不孝不悌不友不恭曾未
聞一言糾其過徒於小廉曲謹腐爛時文以此稱功
盍亦卽赴省士子事思之前輩謂不究心教導所得
束脩與受贓同此言甚當

勸學文

勸學文曰書中自有黃金屋又曰賣金買書讀讀書
買金易自斯言一入于胸中未得志之時已萌貪饕

既得志之後吝其培克惟以金多爲榮不以行穢爲
辱屢玷白簡恬然自如雖有清議真之不恤然司白
簡持清議者又未必非若而人也毋怪乎玩視典憲
爲其文一切寘廉耻於掃地氣習日勝若根天真惟
知肥家庇族而已亦不知其爲蠹國害民也得非蔽
錮於勸學文而然耶是固不可不深責貪饕之徒亦
不可不歸咎於勸學文有以誤之也

富貴貧賤

貧賤不如富貴耶抑富貴不如貧賤耶人莫急於溫

飽靡衣華飾固美矣然補破遮寒其爲溫則一也其
味盛饌亦佳矣然糲食充饑其爲飽則一也溫飽之
餘何必羨富貴哉彼委積愈厚鞭算愈切鬚髮愈白
計慮愈深第宅田園器用服飾曷嘗見其厭足爲子
計又爲孫計惟恐其不克紹日間飲膳失期會夜亦
不能甘寢貧賤者不如是之勞苦也肥甘沈面乃致
疾之媒粉白黛綠皆喪身之具動由順境難禁摧挫
少不如意或飲氣嘔血而暴亡素處參養不耐風霜
稍有感觸雖良藥有所不能療貧賤者不如是之脆

弱也損人致富召怨實多或有意外懷璧其罪水火
盜賊刑禍戮辱其終必不能免官爵雖高冰山亦險
菹醢烹戮載在史冊者不可枚數貧賤者不如是之
驚危也富貴者勞苦貧賤者清閒富貴者脆弱貧賤
者堅固富貴者驚危貧賤者安泰孰謂貧賤不如富
貴耶吁富貴而傲忽貧賤惑之甚也貧賤而諂諛富
貴惑之尤甚也

錢

半輪殘月掩塵埃依稀猶有開元字想見清光未破

時買盡人間不平事古人詠錢如此以余觀之錢之
爲錢人所共愛勢所必爭骨肉親知以之而構怨稔
鬻公卿大夫以之而敗名喪節勞商遠賈以之而捐
軀殞命市井交易以之而鬪毆戮辱乍來乍去倏貧
倏富其籠絡乎一世者大抵福於人少而禍於人多
嘗熟視其形模金旁着兩戈字真殺人之物而世人
莫之悟也吁錢乎錢乎以我之貧求汝活我而不可
得我固無奈汝何以我之不貪汝欲殺我而不可得
汝亦無奈我何

名利

或問殷浩曰將泄官而夢棺將得財而夢糞何也浩
對曰官本臭腐故將泄官而夢尸財本糞土故將得
財而夢穢世以爲知言余因喜曰余之不得名利者
是造物不以臭腐待我也不以糞土予我也出之於
汗穢之從而躋之於清高之境脫之於鄙陋之地而
措之於道義之域拜造物之賜多矣世人名利稍不
得志輒起怨尤何其蠢哉

朋友

君子以文會友以友輔仁友之者友其德也當親密之時握手論心必使君臣父子之倫兄弟夫婦之倫粹然一出於正此交友第一義也夫何世變日薄友道掃地惟酒饌追隨有無周濟穢言相謔術數相勝於是規圖便利諂諛取容此妾婦耳非友也啗以濡沫甘效奔走此奴隸耳非友也惟恐少有櫻拂而取疎遠故隨事苟徇而覲親密乘其父子之睚眦卽導之以不慈不孝乘其兄弟之閭牆卽導之以不友不恭乘其夫婦之反目卽導之以不琴不瑟謬引古今眩亂是非指鹿爲馬野鳥爲鸞皆此等輩也其間稍有見識廉恥者必浩然而去所友者惟小人抑亦何所不至哉

故舊

故舊不遺則民不偷世俗薄故舊衰平日司筆硯同出處同貧賤同患難相與相愛不啻骨肉一旦得志有若路人叮犬不忘家燕尋故壘彼旣犬燕之不若亦何足責世人多以富貴忘舊爲憾此特不能理遣耳理遣宜如何日譬似當初不相識

藥石

方今藥材鄙賤者且數十倍於前貴細者有數十倍於前至携金遶市鋪求之不獲者人孰不知真藥之難得如此凡設鋪而招人贖僞藥者愚也贖僞藥而顛療病者愚亦甚矣吾輩宜何策且宜於飲食衣服上加謹古人首重食醫春多酸夏多苦秋多辛冬多鹹調以滑甘平居必節飲食飯後行三十步不用開藥鋪飲食之加謹者此也急脫急着勝如服藥衣服之加謹者此也或有疾疾奉行不服藥得中醫之語

藥石雖貴未害也最是孝子慈孫侍奉親庭豈忍坐視其病而不救家有餘蓄尚可待良劑貧窶所迫將若之何貧者固難得良劑富者縱得良劑又未必有良醫余因念及此仰天而祝曰願天下人安樂

好官好人

偶見士大夫壁間碑刻云好官易做好人難做衆咸謂知言余切以爲不然好人何難做之有仁義禮智行之在我孝悌忠信行之在我人皆可爲堯舜途之人亦可爲禹人自不爲之耳乃若欲做好官必鑽刺

必營求必俯仰脇肩諂笑懾氣促步惟恐人揮斥其趨事之不周外壞面目內壞心術曾莫之顧求而得者能幾人求而不得者總總也縱求而得所喪已大甚矣做好官之難也

謙遜

常見世人行不肯在人先坐不肯在人上歛衽退縮至再至三謙遜之風良可嘉尚及其見利則逝見便則奪惟恐或後於人雖骨肉亦疎絕契交反眼不相識當行不先人坐不上人之時亦知謙遜爲美事抑何臨小利害乃樂爲是不謙不遜耶矯情可強也真情不可遏也

借親

父母垂死人子於此正哀痛徹骨幾不欲生之時也今人反以送死爲緩惟以借親爲急父母死未卽入棺仍禁家人輩未得舉哀棄親喪之禮而講合禭之儀寘括髮之戚而修結髮之好此夷狄禽獸之所不忍爲而世俗皆樂爲之雖簪纓詩禮之家亦相率而行恬不爲怪不知作俑者誰耶

所見
養軍

近年郡家每月逼期旋糴軍糧支散浙右素號沃饒亦如此艱關萬狀蔑裂百端甚而折錢價直峻減又甚而拖欠未卽舉償軍人敢怨而不敢言蓋明知皆前太守屢任席卷之罪未可咎今太守不能措辦之過也吁飽目前之欲不顧後來之憂徇一家之謀不卹一郡之害留之家家未必能保付之子孫子孫未必能久徒貽害如斯其烈也使後之爲守者其果賢耶則背理傷道決有所不敢爲生財足用必無所措

手足惟以卽能罷去爲幸殆類范文子使祝宗祈死無及於難其亦可哀也已果不賢耶則行爲富不仁之政用移東補西之術決江海以救焚焚滅而溺至飲鳩爵以止渴渴止而身亡號爲能吏不過如此且幾年養軍今日掣肘物價騰踊民不聊生萬一荒歉群盜必起諸軍素抱乏糧之怨孰爲可備警急之人其辭甲使鶴遇暴者反爲暴洎洎皆是也當是時禍必先及於富貴充溢之家不知爲鄉貴爲巨室亦慮及此否然則慮之當如何積而能散

理學

理學湮泊久矣士子不能講貫考官亦罔聞知蓋今日之考官卽前日之士子也方冊中文字害理者不勝其多不堪着眼姑卽其一者言之事大體重莫如省試近年欽哉屢省乃成欽哉乃廢載歌曰元首明哉股肱良哉經魁以敬立而德不孤立說易曰敬以直內義以方外敬義立而德不孤是則敬義可以相有而不可以相無豈得獨指敬耶聖經又豈可減一字耶不知當時爲知舉爲叅詳爲小試官亦曾聞有

所謂理學否經魁且爾一榜可想省試如此他試可知余所謂今日之考官卽前日之士子是也我朝孝宗皇帝一日與崔敦詩論文章關世變敦詩曰臣觀建炎詔文義理明而氣勢壯便知天下必能中興遂誦一篇孝廟諦聽天顏喜甚又問曰六朝五代之文如何敦詩曰六朝之文破碎遂有土地分裂之象五代之文粗悍遂有草茅崛起之象上嘉歎曰卿論得此甚好今日之文義理斷喪其象當如何有識者可以觀矣

獄訟

余近年歸故里首拜先壠爲不肖姪童其山當時不勝哀憤亟訪鄉貴求緘一狀投之郡守因見其書院榜示謂某望早言輕親故或欲緘狀不敢奉命當今之世得忍姑且忍求直未必直余遂不啓齒續見有官君子云某家亦曾訴伐墓木者十八狀追人不出徒重費用余含垢飲氣而已近有所聞又爲之驚駭今日囹圄供荅不由於民情可否一聽於吏手往往奕自撰情款一本令囚人依本書之更不可增損一

字真情無所赴愬呼天神不聞號地祇不聽痛哉痛哉夫獄訟所以平曲直雪冤枉也今有財者勝無財者負有援者伸無援者屈豪強得志貧弱啣冤此豈國家之福耶愚願士大夫司聽斷者在在持平如衡事事至公如鑑天下何患不太平

寒暑

寒猶可禦而暑不可避涼亭水榭風車簟枕世不多有縱有之遇流金爍石之時其爲熱自若也方食冷物又恐生病方食熱物汗決如雨思之爲人何益於

事矧得喪利害不能理遣而心火熾盛妻孥累重支
吾不暇而家火逼迫當此流火而心火家火爲之俱
焚鑊湯爐炭一時頓現一年復一年髮白面皺催入
死途不自知也余觀此境界所以不願有生

茹素

世人以茹素爲齋戒豈知聖賢之所謂齋者齊也齊
其心之所不齊所謂戒者戒其非心妄念也無一日
不齊無一日不戒今之人每於斗降三八庚申甲子
本命日茹素謂之齋戒不知其平日用心何如也況

在茹素之日事至吾前輒趨利徇欲損人害物不知
其茹素何爲也古語兩句甚好寧可葷口念佛莫將
素口罵人

謀利

利者害之對纔謀利卽有害然謀利營生世所不免
爲富不仁人所當戒有能於其間寡願少取殆庶幾
焉寂是不仁之甚者糶糶一節聚錢運本乘米粒狼
戾之時賤價以糶翹首企足俟青黃不接之時貴價
以糶其糶也多方折挫以取贏其糶也雜糠粃而虧

斗斛天生百穀以存活一世而謀利之徒不欲其豐而幸其歉不喜其飽而願其饑逆天心拂人心以此致富而望綿遠萬萬無此理又有富貴之家積穀以邀價放債以取息開庫以解質與民爭利不一而足方且語人曰吾家支遣頗廣不得不如此耳吁倘用度果不足曷不減損環列之侍姬曷不謹節非乏之費用乃甘爲是狠貪使水火盜賊之災刑禍戮辱之危子孫蕩覆之報不在目前則在他日昭然有不能免者善乎孟子有言曰不仁者可與言哉不仁而可

與言則何亡國敗家之有

閒

造物之於人不靳於功名富貴而獨靳於閒天地之間日月之運行星辰之躔度寒暑之推移山川之流峙草木之生息機發輪轉無一息停焉天地且不得閒而閒豈人之所易得哉高爵厚祿清資顯秩班于朝廷列于州縣不知其幾而樂恬退者倒指不一二日顛冥于仕途姑托親戚契識買田園營第宅不獲一見而身亡其有被劾之餘安意家食特迫於勢窮

力屈而然非其本心也對賓客方有築室返耕高潔
自許之清談入私室又作搖尾乞憐于時求進之尺
牘囊篋鎖鑰惴惴于手收支簿書介介于懷一日十
二時無一隙得暇而好山好水風清月明何嘗見此
風景縱或見之又何嘗識此旨趣勞勞攘攘死而後
已若夫富家翁守錢虜抑又不足道也名曰享富貴
其實一俗子孰若安分清閑之野叟哉故曰身閒則
爲富心閒則爲貴又曰不是閒人閒不得閒人不是
等閒人

貪欲

五十不造宅六十不製衣縱饒得受用能有幾多時
余年近七旬儘宜省事樂閒息心退步何必貪欲於
受用無幾之口圓覺經云諸苦所因貪欲爲本余庶
幾乎免矣蓋貪欲二字壞盡世間人得便宜處再往
得便宜事再做終有悔吝之時今日進得一步明日
又求進一步恐是顛躋之兆堆金積玉來處要明越
分過求餘殃在後臥病垂死術數未休幾年勞役一
場春夢明珠一百斛更添百斛也只心不足侯印十

九枚更添一倍也只眉不開孔丘盜跖俱塵埃少陵老子今亦安在哉

禱祈

世人不思積善積惡殃慶各以類至惟托緇黃誦經持呪或謂保扶或謂禳災或謂薦亡如此則有資財者皆可免禍矣昔寒山見人家懸幡因作頌曰半作幡身半作脚挂在空中驚鳥雀行住坐臥思量着只好把與窮漢做襖着達哉斯言

科舉

永嘉科舉極狼狽只緣多試一日以至士子多膽公本只書義終場自有三萬三千餘卷考官例以雷同冗長視之僅看兩三日已厭惡矣其間好文宇多不及考而謬種之考官亦不能識中才之考官眩惑於卷之多又無所別白加之吏胥作弊不一取士之法於是大壞若得善舉送者申明條制痛革諸弊一人只許一卷庶無負國朝設科之美意

太行山

有一主一僕久行役忽登一山遇豐碑大書太行山

三字主欣然曰今日得見太行山僕隨後撇撇官人不識字只是太行山安得太行山主叱之僕姍笑不已主有怒色僕反謂官人試問此間土人若是太行山某罰錢一貫與官人若是太行山官人當賞某錢一貫主笑而肯之行至前聞市學讀書聲主曰只就讀書家問遂登其門老儒出接主具述其事老儒笑曰公當賞僕矣此只是太行山僕在側視主曰又却某之言是主揖老儒退僕請錢卽往沽飲主俟之稍久大不能平復求見老儒詰之將謂公是土居又讀書可證是否何亦如蠶僕之言太行耶老儒大笑曰公可謂不就事一貫錢瑣末耳教此等輩永不識是太行山老儒之言頗有味今之有真是非遇無識者正不必與之辯



